



Adresa: **Ul. H. Čemerlića 39a**
71000 Sarajevo
<http://www.voda.ba>

tel. +387 33 726-400
fax. +387 33 726-423
e – mail: info@voda.ba

Broj: **UP-1/21-3-40-234-5/26**
Datum: **03.07.2026. godine**

„Agencija za vodno područje rijeke Save“ Sarajevo rješavajući po zahtjevu investitora „Sirovine Pezić“ d.o.o. Kalesija, za donošenje rješenja o vodnoj dozvoli za ispuštanje oborinskih onečišćenih voda sa lokacije poslovnog kompleksa za otkup, preradu i prodaju sekundarnih sirovina, izgrađenog u privrednoj zoni općine Kalesija, na osnovu člana 109. stav (1) tačka 2. Zakona o vodama („Službene novine Federacije BiH“, broj 70/06) i člana 200. stav (1) Zakona o upravnom postupku („Službene novine Federacije BiH“, broj 2/98, 48/99 i 61/22), donosi:

RJEŠENJE **o vodnoj dozvoli**

1. Pravnom licu „Sirovine Pezić“ d.o.o. Kalesija daje se vodna dozvola za ispuštanje oborinskih onečišćenih voda u prirodni recipijent sa lokacije poslovnog kompleksa za otkup, preradu i prodaju sekundarnih sirovina, izgrađenog na zemljištu označenom kao k.č. broj: 1216/57 K.O. Prnjavor, Općina Kalesija.
2. Ova vodna dozvola ne oslobađa podnosioca zahtjeva obaveze pribavljanja saglasnosti i dozvola od strane drugih nadležnih organa, a sve u skladu sa važećim zakonskim propisima, uredbama i dr.
3. Vodna dozvola se daje na osnovu činjeničnog stanja utvrđenog pregledom dostavljene projektne i druge dokumentacije, izvršenog uviđaja na objektu i pod sljedećim uslovima:
 - 3.1. Da pravno lice „Sirovine Pezić“ d.o.o. Kalesija obezbijedi da se sistem za prikupljanje, prečišćavanje i ispuštanje otpadnih voda sa lokacije poslovnog kompleksa za otkup, reciklažu sekundarnih sirovina sa pratećim sadržajima, održava u funkcionalnom stanju i koristi u skladu sa namjenom i uslovima iz ove vodne dozvole.
 - 3.2. Korisnik poslovnog objekta za sve vrijeme trajanja ove vodne dozvole, mora obezbijediti da se oborinske onečišćene vode sa saobraćajnih i manipulativnih površina zajedno sa oborinskim otpadnim vodama nastalim na otvorenim platoima - lagerima namijenjenim za prihvatanje, skladištenje i primarnu preradu sekundarnih sirovina nesmetano prikupljaju sistemom slivnih rešetki i kanalizacione mreže te odvede do uređaja za prečišćavanje onečišćenih voda separatora/taložnika sa duplim koalescentnim filterom, kapaciteta $Q=20$ l/s, a zatim preko okna za monitoring ispuštaju u recipijent - otvoreni kanal za odvodnju oborinskih voda sa pružnog pojasa.
 - 3.3. U toku važenja ovog Rješenja, korisnik predmetnih objekata je obavezan poduzeti sve potrebne mjere kako bi kvalitet oborinskih onečišćenih otpadnih voda, a prije ispuštanja u recipijent, zadovoljio granične vrijednosti u skladu sa odredbama Uredbe o uslovima ispuštanja otpadnih voda u okoliš i sisteme javne kanalizacije („Službene novine Federacije BiH“, broj: 26/20, 96/20 i 1/24).
 - 3.4. Korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring (mjerno mjesto E 1) u skladu sa odredbama Uredbe o uslovima ispuštanja otpadnih voda u okoliš i sisteme javne kanalizacije.
 - 3.5. Čišćenje separatora, taložnika i pratećih elemenata, te odvoz i konačno zbrinjavanje otpadnog mulja i taloga, kao i opasnog otpada sa predmetne lokacije može vršiti isključivo firma ovlaštena za tu vrstu djelatnosti, prema sklopljenom ugovoru. O načinu i vremenu radova održavanja, odnosno o pražnjenju, odvozu i zbrinjavanju sadržaja separatora ulja i masti, neophodno je voditi službenu evidenciju i arhivu.

- 3.6. Sadržaj (mulj) iz uređaja za prečišćavanje otpadnih voda i ostali otpad ne smije se odlagati na česticu „vodno dobro“, odnosno u vodotoke i na njihove obale.
- 3.7. Da se u skladu sa propisima iz oblasti zaštite okoliša vrši bezbjedno skladištenje i postupanje sa opasnim materijama i otpadom nastalim na predmetnom lokalitetu (adekvatnim mjerama onemogućiti bilo kakvo isticanje i rasipanje opasnih i štetnih materija na tlo i u vode).
- 3.8. Osigurati priručna sredstva za brzu intervenciju u slučaju nekontrolisanog rasipanja opasnog otpada i isticanja naftnih derivata, kako bi se spriječilo moguće onečišćenje voda i tla.
- 3.9. Investitor je obavezan pridržavati se svih mjera i uslova propisanih u saglasnostima i dozvolama, izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11 i 88/12), Prilog 1. Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda, te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
5. U periodu važenja ove vodne dozvole, Investitor, odnosno korisnik objekta „Sirovine Pezić“ d.o.o. Kalesija je dužan provoditi sve mjere i aktivnosti propisane istom.
6. Ukoliko radom predmetnog objekta dođe do šteta bilo kakvog karaktera, korisnik vodne dozvole je dužan uzroke nastalih šteta otkloniti, a nastale štete trećim licima nadoknaditi.
7. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik objekta obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
8. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na objektima poslovnog kompleksa za otkup, preradu i prodaju sekundarnih sirovina sa pratećim sadržajima obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
9. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
10. Ova vodna dozvola, shodno članu 117. stav (1) Zakona o vodama, daje se sa rokom važenja od 5 (pet) godina od dana pravosnažnosti ovog rješenja.
11. Prije isteka važenja ove dozvole, Investitor je dužan da podnese zahtjev za izdavanje nove vodne dozvole.
12. Ova vodna dozvola može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev.

O b r a z l o ž e n j e

Pravno lice „Sirovine Pezić“ d.o.o. Kalesija, zahtjevom bez broja od 26.05.2026. godine se obratilo ovoj Agenciji za donošenje rješenja o vodnoj dozvoli za ispuštanje oborinskih onečišćenih voda sa lokacije poslovnog kompleksa za otkup, preradu i prodaju sekundarnih sirovina, izgrađenog na zemljištu označenom kao k.č. broj: 1216/57 K.O. Prnjavor, Općina Kalesija.

U provedenom postupku dostavljena je i pregledana sljedeća dokumentacija:

- Kopija rješenja o vodnoj dozvoli broj: UP-I/25-3-40-201-4/21 od 07.06.2021. godine izdatog od strane Agencije za vodno područje rijeke Save Sarajevo;
- Ovjerena kopija Rješenja o registraciji, broj:032-0-Reg-08-001515 od 15.08.2008. godine izdato od strane Općinskog suda u Tuzli;
- Ovjerena kopija Rješenja o dozvoli za upravljanje otpadom broj: 12/1-19-024924/23 od 04.09.2023. godine izdato od strane Ministarstva prostornog uređenja i zaštite okolice Tuzlanskog kantona;
- Kopija Rješenja o odobrenju za izgradnju broj: 02/2-1-23-2-2198 od 13.08.2015. godine izdato od strane Službe za prostorno planiranje, građenje i komunalne poslove općine Kalesija;
- Ovjerena kopija Uvjerena o poreznoj registraciji od 15.12.2016. godine izdato od strane Kantonalnog poreznog ureda u Tuzli;
- Opći akt o održavanju, korištenju i osmatranju vodnog objekta i postupanju u slučaju kvara ili havarije donesen 01.04.2016. godine;
- Izvještaj o monitoringu kvaliteta i kvantiteta otpadnih voda broj: 7-230-2846/26, april 2026. godine urađen od strane TQM d.o.o. Lukavac;
- Glavni projekat prikupljanja, tretmana, odvodnje i ispuštanja otpadnih voda u recipijent za potrebe izgradnje poslovnog objekta za otkup i primarnu preradu sekundarnih sirovina locirane u Industrijskoj zoni u Kalesiji na zemljištu označenom kao k.č. broj: 1216/57 upisane u K.O. Prnjavor, Općina Kalesija, urađen od strane JPVD „Spreča“ d.d. Tuzla, april 2015. godine;
- Kopija radnog naloga i fakture za čišćenje separatora;
- Dokaz o uplati upravne takse.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari i u skladu sa članom 12. stav (5) i (6) Pravilnika o sadržaju, obliku, uvjetima, načinu izdavanja i čuvanja vodnih akata („Službene novine Federacije BiH“, br. 31/15, 55/19, 41/20 i 63/22), izvršen je obilazak predmetne lokacije i tom prilikom sačinjen zapisnik o uviđaju broj: UP-1/21-3-40-234-2/26 od 12.06.2026. godine.

Uvidom u dostavljenu dokumentaciju i izvršenim uviđajem na licu mjesta može se konstatovati sljedeće:

- Poslovni prostor za otkup i primarnu preradu sekundarnih sirovina lociran je u industrijskoj zoni u Kalesiji, na zemljištu označenom kao k.č. broj 1216/57 upisane u K.O. Prnjavor, Općina Kalesija.
- Na prostoru poslovnog kompleksa nalaze se sljedeći objekti i radne površine: upravna zgrada sa kolskom vagonom, vanjski parking prostor - plato P-1, plato za skladištenje i primarnu preradu sekundarnih sirovina - radni plato P-2, plato za skladištenje sekundarnih sirovina –radni plato P-3, manipulativne saobraćajnice - plato P-4, zelene površine.
- Sve radne, manipulativne i saobraćajne površine su uređene i asfaltirane sa riješenim sistemom odvodnje oborinskih voda.
- Oborinske vode sa krovova i zelenih površina se bez tretmana upuštaju u recipijent - otvoreni kanal za odvodnju oborinskih voda sa pružnog pojasa, zajedno sa tretiranim oborinskim vodama.
- Zagađene oborinske vode koje nastaju u vrijeme oborina ili usljed pranja asfaltiranih površina na vanjskim platoima (parking prostor- plato P1, radni plato P-2, skladišni prostor P-3) se prikupljaju sistemom kanala, slivnika i rešetke te jedinstvenim sistemom odvođa do separatora/taložnika sa duplim koalescentnim filterom Q=20 l/s. Nakon tretmana u separatoru voda se preko monitoring okna putem cijevi odvođa do recipijenta - otvoreni kanal za odvodnju oborinskih voda sa pružnog pojasa.
- Vodosnabdijevanje objekta je riješeno priključkom na javnu gradsku vodovodnu mrežu pod ingerencijom JP „Vodovod i kanalizacija Kalesija“ d.o.o. Kalesija.
- U procesu prerade sekundarne sirovine ne koriste se hemikalije. Na prostoru se ne vrši skladištenje nafte i naftnih derivata.
- Redovno pražnjenje septičke jame, čišćenje separatora, preuzimanje rabljenog ulja i opasnog otpada vrši „Kemeko-BH“ d.o.o. Lukavac.

- Rezultati analiza tretiranih voda prije upuštanja u recipijent (mjerno mjesto E-1) zadovoljavaju granične vrijednosti emisije propisane Uredbom o uslovima ispuštanja otpadnih voda u okoliš i sisteme javne kanalizacije.

Na osnovu dostavljene dokumentacije i uviđaja izvršenog na predmetnoj lokaciji, a u svrhu smanjenja negativnih uticaja predmetnog objekta na stanje voda i vodni režim, podnosiocu zahtjeva su ovom vodom dozvolom u tački 3. dispozitiva Rješenja propisani uslovi u skladu sa odredbama članova 53. i 116. Zakona o vodama, članova 12. i 13. Pravilnika o sadržaju, obliku, uvjetima, načinu izdavanja i čuvanja vodnih akata i odredbama člana 3. tačka s) i članova 14., 19. i 20. Uredbe o uslovima ispuštanja otpadnih voda u okoliš i sisteme javne kanalizacije.

Tačkom 4. dispozitiva rješenja propisana je obaveza u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opštih i posebnih vodnih naknada („Službene novine Federacije BiH“, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH“, broj 46/07, 10/14 i 03/16).

Na osnovu provedenog postupka konstatuje se da je podnosilac zahtjeva „Sirovine Pezić“ d.o.o. Kalesija ispunio minimum uslova za izdavanje vodne dozvole za ispuštanje oborinskih onečišćenih voda sa lokacije poslovnog kompleksa za otkup, preradu i prodaju sekundarnih sirovina, izgrađenog na zemljištu označenom kao k.č. broj: 1216/57 K.O. Prnjavor, Općina Kalesija, te je riješeno kao u dispozitivu ovog rješenja.

Podnosilac zahtjeva je, na ime izdavanja ovog vodnog akta, izvršio uplatu federalne pristojbe iz tar. br. 43. Zakona o federalnim upravnim pristojbama i Tarife federalnih upravnih pristojbi („Službene novine Federacije BiH“, br. 6/98, 8/00, 45/10 i 43/13).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obrađivač akta: Munir Trako, dipl.inž.građ.

Prilog:

Glavni projekat prikupljanja, tretmana, odvodnje i ispuštanja otpadnih voda u recipijent za potrebe izgradnje poslovnog objekta za otkup i primarnu preradu sekundarnih sirovina locirane u Industrijskoj zoni u Kalesiji na zemljištu označenom kao k.č. broj:1216/57 upisane u K.O. Prnjavor, Općina Kalesija, urađen od strane JPVD „Spreča“ d.d. Tuzla, april 2015. godine.

Po ovlaštenju
Rukovodilac Sektora za izdavanje vodnih akata

Nihad Pezo, dipl.inž.građ.

Dostaviti:

- „Sirovine Pezić“ d.o.o. Kalesija, Privredna zona bb, 75 260 Kalesija (Prilog)
- Ⓢ AVP Sava, ISV - vodna knjiga
- Sektor 50
- Sektor 40 - arhiva
- Oglasna tabla AVP Sava Sarajevo